

Despues di tanto situacion fastioso cu hoben

A busca personal di siguridad pa Biblioteca Nacional despues di tanto situacion fastioso

ORANJESTAD - Aunke no ta tur mucha ta un problema, Biblioteca Nacional tin personal di siguridad awor despues di tanto keho di problema cu hoben pafo y paden di e edificio.

Segun algun empleadonan di Biblioteca Nacional ta splica Bon Dia Aruba, polis ta te hasta cansa di tanto biaha cu nan mester bin acudi cu problema y pelea entre hobennan anto ta precisamente cu habrimento di e aña escolar aki e situacion a empeora.

“Siman pasa, ‘awa a pasa hariña’ caminda tabata tin dos dia tras di otro cu mester a pidi intermediacion di polis akinan. Siguridad di bo personal ta importante pero tambe di e usuarionan cu ta bini biblioteca y p’esey tambe nos tin un trahado di siguridad desde awo pa dilanti”, directora di Biblioteca Nacional Astrid Britten ta bisa.

E ta splica Bon Dia Aruba, ora bo ta haya bo cu cierto circunstancia na dado momento bo mester tuma un decision. “Keda sin haci nada no ta un opcion pues bo mester haci algo dentro di bo posibilidadnan. Naturalmente, no ta tur mucha ta un problema anto mi ta lamenta e hecho cu esunnan cu si kier haci uzo di e luga optimalmente ta wordo stroba.”

Sra. Britten ta splica cu e ta compronde e “peer pressure”, sin embargo hobennan mester tene mas na cuenta cu kende nan ta anda. Tin biaha ora cu e ta papia cu algun di e hobennan, nan ta reclama cu



nan no conoce e persona cu ta bini busca problema cu nan na biblioteca. Sra. Britten ta comenta cu esaki mayoria biaha ta dificil pa kere mirando cu tin hopi indicacion cu ta al contrario.

Formamento di gang cu ta ‘chill’

Sra. Britten ta bisa Bon Dia Aruba cu e ta haya varios hoben cu ta bisa cu nan ta bin ‘chill’ na biblioteca siendo cu nan por haci mescos otro caminda manera Linear Park of Wilhemina Park por ehempel. “Asina ki bo no ta stroba otro hende anto porta bo por haci locual cu bo kier pero no na biblioteca unda tin muchanan cu si ta haciendo bon uzo di dje pa studia.” Bon Dia Aruba a papia cu varios hoben cu ta bisa cu biblioteca sinembargo a bira mas tranquil pa motibo cu e reglanan di tolerancia entre otro a bira mas estricto. Sin embargo, siman pasa mes tabata tin un incidente caminda cu tabata rekeri

asistencia di polis y K-9 Unit pa un supuesto pelea y menasa cu arma di candela pafo di e edificio. Un empleado a comenta cu el a ripara diahuebs merdia polis a circula e edificio como cinco biaha. Segun un hoben ta conta Bon Dia Aruba, no ta cuestion di gang pero mas tanto grupo di amigonan cu ta bini hunto ora cu tin un pelea of ‘reglamento di cuenta’.

Algun hoben cu Bon Dia Aruba a logra papia cu nan ta splica cu ta prome biaha ta tende di un arma di candela pero cu varios biaha tin hoben tin cuchiu y te hasta machete riba nan. Bon Dia Aruba no a logra haya un reaccion for di polis riba e asunto aki ainda. “E problema di formacion di gang di cierto grupitonan cu tin, na dado momento bo ta mira cu muchanan cu ta aki den ta involvi cu locual ta pasando pafo. Nos no kier pa e influencia di pafo bini na e parti paden. Tin hopi mucha cu ta hopi serio mes, studiando anto bringando duro pa nan logra specialmente esunnan cu tin aña perdi cu extra esfuerso. Ta haci falta di structura y respet anto mi ta kere cu esey ta balornan cu nos mester enfoca riba nan anto nos mester subraya nan pasobra nan ta sumamente importante,” sra. Britten ta bisa. Reaccion di hoben

Bon Dia Aruba a combersa cu un hoben di 14 aña di edad cu ta bisa cu e no mag di drenta e edificio mas pasobra cu el a haya su mes den algun problema den pasado.

Continuacion riba pagina 5



Biblioteca Nacional

Continuacion di pagina 2

Aunke e no a elabora mucho ta kico exactamente a sosode, tin indicacion cu esaki tabata algun tipo di discusion entre e hoben y empleadonan di Biblioteca Nacional unda palabranan hopi fuerte a wordo uza.

E hoben hunto cu su amiga di 16 aña di edad ta splica Bon Dia Aruba cu polis ta core cu nan tur otro caminda cu nan bay y ta p'esey nan ta bay 'chill' banda di biblioteca despues di scol. "Nos no por bay beach pasobra polis ta core cu nos y papia hopi fresco cu nos tambe," e hoben di 14 aña ta bisa. Bon Dia Aruba a puntr'e aki pakico polis ta core cu nan for di beach pa locual el a keda contesta "ami no sa, porta pa e holo di huma cu nan ta haya nan ta core cu nos."

Directora di Biblioteca Nacional ta bisa cu semper tin regla pa cumpli cun'e tur caminda como bo tin tambe na bo mesun cas. "Na bo cas mi no ta kere bo ta bay haya un bishita yega anto habri e frigidaire anto sinta manera cu e kier den bo cas. Pues akinan tambe bo mester sa cu tin regla anto kisas avoraki nos ta un poco mas stricto cu reglanan cu tin pero semper tabata tin regla," sra. Britten ta splica Bon Dia Aruba agregando cu hopi bialha tin hoben ta bira masha fresco y cuminsa papia palabra malo y lisamento di stem cual ta fastioso pa otronan cu ta studiando.

"Ta hopi hende ta bin y haci uzo di e instituto aki anto busca informacion. Esunnan cu ta bin akinan anto no tin nada di haci e ta kisas un escogencia of ta anda cu mal amigo. Nos ta aprecia tur hende cu ta bin biblioteca y pa sigui bin biblioteca pero haciendo bon uzo di nos facilidadnan." □